

HERRITARREN ELIKADURA BEHARRAK ASETZERA BIDERATUTAKO ESTRATEGIA ETA PROGRAMA INTEGRALEN INGURUKO KONTROL MOZIOA

Olaia Duarte Lopezek, EH BILDU udal taldeko zinegotziak, Udaltzaren Organo Araudiaren 98. artikulua oinarri, mozio hau aurkezten du Udaltzatan azter dadin. Mozioa 2022ko azaroaren 14an Pertsonen Zerbitzuen Batzordean aztertutako interpelazioaren ondorioa da.

JUSTIFIKAZIOA

Espainiako Elikagai Bankuen Federazioak (FESBAL) egiaztatu du elikagaien eskaera %50 igo dela azken urtean, COVIDen pandemia hasi zenetik. Gipuzkoaren kasuan, elikagai bankuen ordezkariak diote, pobrezia larriaren dauden pertsonen gain, COVIDek sortutako baldintza ekonomikoen aurretik errenta ertainak edo txikiak zituzten eta orain egitura prekarioa galdu duten familiak ere laguntza eske joaten hasi direla. 2021ean %25 handitu zen Gipuzkoan elikatzeko laguntza behar izan zuten pertsonen kopurua. Hala, urtea amaitu baino lehen 21.638 familia artatu zituzten eta 3 milioi kilo elikagai banatu ziren; 2020an baino %35 gehiago.

Hain zuzen ere, gure udal taldeak maiatzean hainbat eragile sozialekin (Gurutze Gorria, Emaus, Arrats, Sos Arrazakeria...) egindako bileretan, guztiek konpartitu zuten elikagai beharren kezka.

Urriaren 26an Donostian egindako *Kale Gorrian* azterlanak ere garbi utzi zuen hirian bizitegi bazterketa larriaren bizi diren pertsonentzat hainbat donostiarrek martxan jarritako Kaleko Afari Solidarioak izeneko ekimenaren garrantzia, egunean behin janari bero bat jateko aukera izateko.

Izan ere, 2020ko azaroan, duela bi urte, Parte Zaharreko hainbat bizilagunek KAS taldea osatu zuten, kale gorrian zeuden norbanakoei afari beroak eskaintzeko gauero. Hilabete batzuk geroago, 2021eko martxoan, Egiako bizilagunek jarri zuten martxan ekimen bera.

EH Bildu talde politikoa **Grupo político EH Bildu**

lJentea, 1 - Tel. 943481027 - www.donostia.ehbildu.eus -
20003 Donostia

Aurten, Amarak sortu du bere talde propioa martxoan. Gaur egun, ekimen honi esker, 100 boluntariok egunero 150 afari inguru banatzen dituzte Donostian: 50 Parte Zaharrean, hor hasi baitzen ekimena; 70 Egian, han iritsi baitzen urrunen onuradun kopurua, eta beste 30, Amaran. Guztira, 67.000 afari banatu dira bi urteetan 134.000 euroko aurrekontuarekin, Donostiako Udalaren inolako diru-laguntzarik gabe.

Gauzak horrela, askotan gogorarazi diogu Udal Gobernuari nolako lana egiten duten hirugarren sektoreko eragileek erakunde publikoak uzten dituen hutsuneak betetzeko eta, gutxienez, ekimen horiek lagundu eta bultzatu behar direla (erakunde publikoek zuzenean lan horiek egin arte behintzat).

Udal Gobernuak etengabe adierazi digu ezin dituela elikagai beharrak asetzeko ekimenak diruz lagundu, hainbat arrazoiengatik, baina Udal Gobernu Batzordearen 2022ko maiatzaren 31ko bileran, 108.820 euroko dirulaguntza bideratu ziren Ondarretako aterpetxean Ukrainatik etorritako pertsona errefuxiatuei elikagai zerbitzua emateko. Bestalde, Udal Gobernuak berak elikagai zein beste zenbait baliabide banaketak egiten dituzten hainbat ekimen bultzatzen eta laguntzen ditu: Zaporeak elkartearen bidez pertsona errefuxiatuei egiten zaien elikagai banaketa, Gurutze Gorriak abenduan egoera ekonomiko zaugarrian dauden umeentzat egiten duen jostailu banaketa eta Eusko Jaurlaritza berak (Gurutze Gorriaren bidez) 2023ko urtarrilaren 1etik aurrera martxan jarriko duen elikadura-bonua ere.

Aitzitik, azaroko batzordeetan Gizarte-ekintzako delegatua interpelatu genuenean, urteko 365 gauetan Donostiako auzoetan banatzen diren afari beroen ekimena ez babesteko arrazoiak zirela-eta, Udal Gobernuaren ustez, afarien sistema "zaharra" zela adierazi zigun eta Udal Gobernuak gizarte-lan profesionalizatuaren alde zegoela.

Zaila da argudio hau ulertzea, azaldu den bezala, beste kasu askotan gizarte-lanak boluntarioen esku uzten direnean eta, era berean, administrazio publikotik hirian dagoen eskari guztia asetzeko zerbitzurik eskaintzen ez denean. Izan ere, gaur egun Donostiako Udaletik kudeatutako Otorduak programek (etxerik gabeko pertsonen eguneko menua ematea hiriko ostalaritza-establezimenduetan) eta banatzen diren

EH Bildu talde politikoa
Grupo político EH Bildu

Ijentea, 1 - Tel. 943481027 - www.donostia.ehbildu.eus -
20003 Donostia

elikagai-poltsek ez dute gaur egungo demanda asetzen eta ez daude koordinatuta hirugarren sektorearen proiektuekin. Bestalde, Eusko Jauraritzatik banatu omen diren bonoen kudeaketa ere ez da koordinatuko hirian elikagai banaketa egiten duten agente guztiekin.

Azaldutako egoera kontuan hartuta, behean sinatzen duen zinegotziak honako MOZIO hau aurkezten du:

KONTROL MOZIOA

1.- Udalbatzak hertsatuki eskatzen dio Udal Gobernuari Kaleko Afari Solidarioak ekimenarekin elkar dadila, afari beroak jasotzera gauero hurbiltzen diren pertsonei laguntzeko estrategia bateratu bat adosten ahalegintzeko.

2.- Udalbatzak hertsatuki eskatzen dio Udal Gobernuari giza eskubideen eta oinarriko beharren alde lan egiten duten gizarte-ekimenak laguntzea.

3.- Udalbatzak hertsatuki eskatzen dio Udal Gobernuari diagnostiko bat egin dezala, hirian elikadurarako laguntza ematen duten zerbitzu publiko, eragile pribatu zein elkarteekin batera, egunero ematen diren baliabide, laguntza eta haien onuradunen kopuruaren eta baldintzen estimazio eguneratu bat izan dezagun.

4.- Udalbatzak hertsatuki eskatzen dio Udal Gobernuari, egindako diagnostikoarekin koherentzian, elikagaiak bermatzeko estrategia integralagoa diseinatu dezala, hirian gaur egun dauden beharrei erantzuteko.

Donostian, 2022ko abenduaren 15ean

Olaia Duarte López
EH Bildu udal taldeko zinegotzia